



*Senin, 20 November 2023*

**Ogen: LUKAS 1:58**



**Maba Anak Isunatken**



Sada tradisi kiniteken si tetap denga ilakoken bangsa Jahudi seh bas paksa genduari e me isunatken. Biasana anak bangsa Jahudi isunatken sangana ia umur 8 wari. Sunat enda ipedahken Tuhan man bangsa Israel selaku penanda etnis si nuduhken maka ia e me bagin bas bangsa Israel nari. Tuhan Jesus pe kenca ipupus Maria, umur 8 wari pe iendesken guna i sunatken. Tapi lit ka nge sunat ilakoken man kalak dewasa selaku tanda bengketna ia jadi komunitas kalak Jahudi. Alu bage banci si idah maka sada dampar sunat enda secara sosial nuduhken identitas. Secara kiniteken pe sunat jadi tanda bengketna sekalak jelma ku bas perpadanen ras keleng ate Tuhan.

I bas ogenta, ituriken maka Johanes pe isunatken bas umurna 8 wari, bali ras Yesus pe isunatken kenca umurna 8 wari. Reh kerina kade-kade guna ermeriah ukur dengen jadi saksi sada dahin si mulia e. Johanes isunatken i rumah bapana. Semalna ope isunatken maka lit kata pasu-pasu semacam toto isehken man anak e, banci ibelasken bapana adi ia si nyunatkenca, janah adi bapana la ngasup, e ibelasken keluarga si deban. Isina kira-kira "terpujilah gelar Tuhan si enggo ngurasi kita alu ajaren-ajarena ras si mpeatanken kita nyunatken anakta enda", emaka nina bapana, "Terpujilah Kam O Tuhan Dibata kami, Raja Doni si nggo mpebadiaken kami alu ajaren-ajarenNdu, Kam si merentahken kami erbahan ia bengket ku bas perpadanen Abraham, bapa kami".

Senina Moria, si babalah anakta ersunat mulai kitik-kitik nari, sabap e nggo ipedahken Dibata, tanda kepatuhenta, tanda dirinta selaku kerajangenna. Kai sinipedahken Dibata pasti mehuli. Salah sada kiniulin sunat, bas kesehaten ngatakenca maka kalak si ersunat sehaten asangken si la ersunat. Sunat fisik pe sehat, apaika sunat si iajarken rasul Paulus, e me sunat pusuh. Babailah anakta bengket ku bas pengajaren ras keleng ate Tuhan kitik-kitikna nari.